



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Jullu 2009

Edisaun : Jullu 2009

Desde Terseiru Dia Julgamentu ba Kazu 11 de Feveiriu 2008: Arguidu Balun La Hetan Assistensia Legal husi Sira Ninia Advogadu

Segunda feira dia 27 de Jullu 2009 Tribunal Distrital Dili hala'o kontinuasaun julgamentu ba kazu attentadu ho numeru 79/C.ord/2009. Kontinuasaun julgamentu ne'e hala'o hodi rona depoimentus husi testemuña konaba attentadu husi matebian Major Alfredo Reinado Alves no ninia membrus iha rezidensia presidente Metiaut, Dili iha dia 11 de Feveiriu 2008. Julgamentu ne'e hala'o hodi rona depoimentus husi testemuña AF nu'udar testemuña importante tanba mumentu akontesimentu AF hala'o nia kna'ar iha rezidensia Prezidente.

Hanesan julgamentu antes sira seluk, prosesu julgamentu ne'e lidera husi Juizes Kolektivu ne'ebe lidera husi Juiz Prezidente Costancio Basmery, Adjuntu Juiz Antonino Goncalves no Adjuntu Juiz Deolindo dos Santos, nune'e husi parte Ministeriu Publiku reprezenta Prokurador Internasional Felismino Cardoso nomos arguidu sira hetan akompaña husi Defensor Publiku (Dr Andre P, Dr Manuel Sarmiento) no husi Advogado Privadu (Dr Jose Pedro Camoes, Dr Benevides Correia Barros, Dra Zeni Ardnt no ninia assistente Jhon Tippett)

Advogado Privadu Benevides Correia Barros nu'udar defensor ida husi arguidu barak inklui Salsinha maybe Advogadu Benevides dala barak ona la marka prezensa iha tribunal hodi defende arguidu sira ho razaun ne'ebe la klaru nune'e tribunal liu husi Juiz Prezidente foti desizaun hodi troka advogadu ne'e ho advogadu seluk nune'e bele fo assistensia legal ba iha arguidu sira.

Razaun fo poder ba defensor no advogadu seluk ne'ebe prezente, tanba durante ne'e advogadu Benevides nunka marka prezensa iha julgamentu hodi fo assistensia ka defeza ba direitu arguidu sira nian ne'ebe fo ona kompetensia tomak ba nia iha prosesu julgamentu laran. Prokurador Internasional Felismino Cardoso lamenta ba iha tribunal katak tuir loloos kompetensia ne'ebe mak fo ne'e la bele halo iha tempu prosesu julgamentu la'o hela.

JSMP hanoin katak wainhira advogadu ne'e hetan duni ameassa husi parte balun, atu hatudu responsabilidade moral deve-ser marka prezensa iha tribunal hodi hato'o direktamente ba tribunal hodi fo oportunidade ba arguidu sira atu hetan fali defensor antes prosesu julgamentu hahu.

JSMP rekomenda ba advogadu sira ne'ebe pratika iha tribunal atu fokus ba ninia kna'ar hodi fo defeza legal ka assistensia legal ba arguidu sira no wainhira iha buat ruma karik uluk nana'in deve-ser fo hatene antes mai tribunal ka ba arguidu sira ne'ebe durante ne'e hetan akompania, nune'e Juiz iha julgamentu laran la prezisa hanaruk tan tempu hodi deskuti uluk se mak sei sai defensor ba arguidu sira ne'ebe ninia advogadu la marka prezensa iha tribunal.

Atu hetan informasaun kle'an favor kontaktu:
Roberto da Costa Pacheco
Koordenador ba Peskizador Juridiku
Diresaun e-mail: beбето@jsmp.minihub.org
Landline: 3323883